

Patrimoni mundial Sardona sin buna via

La Pro Flem finanziescha studi davart la realisabladad

■ **(Iq) Il cussegl da fundaziun da la Pro Flem ha concedì divers credits per realisar in studi davart la realisabladad da divers eveniments en connex cun il patrimoni mundial Sardona.** Uschia possia la ruosna vegnir serrada fin che la finanziaziun davart dal turissem saja reglada. La via saja libra uss per la planisaziun d'eveni-

ments da la natira en connex cun l'access da Cassons. La finamira saja d'integrar la purschida existenta da vias da viandar e las pussaivladads da transport en il patrimoni mundial da l'Unesco. Tar il project dal futur sa tractia d'ina vart dals «munds d'aua Flem» che cumpiglian er in lieu d'inscunter per giasts. Plinavant sa tractia dal

project «Trutg dil Flem» che dettia in'invista surprendenta da la cuntrada da Flem grazia ad in trassé spectacular e las punts da *Jürg Conzett*.

Chattà consens per l'access da Cassons

En connex cun l'access da Cassons hajan las diversas partidas chattà in consens cun l'Arena Alva. La realisaziun da la «Varianta Y» proponida per colliar Cassons duaja vegnir evaluada tras in studi da realisabladad tecnic. In segund studi duaja mussar las pussaivladads co furmar il territori Crap la Tgina–Cassons. *Thomas Ragetti*, il president communal, haja concedì che la finanziaziun turistica da la destinaziun Flem Laax Falera fetschia main progress che spetgà. Sco quai ch'il cussegl da fundaziun da la Pro Flem communitgescha existia dentant gia ina decleraziun d'intenziun dals acziunairs da Flem Laax Falera management SA che valia sco basa per ina finanziaziun futura.



Las Dunschalas èn ina part centrala dal patrimoni mundial Sardona. MAD